

Miomirka Melank

Delegatkinja u Domu naroda Parlamenta FBiH
Sarajevo, 5. 8. 2024. godine

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Primljeno: 07 -08- 2024			
Org. jed.	Broj	Priloga	Vrijednost
02 - 02 -		1896	/24.

Dostaviti:

Bosna i Hercegovina
Federacija Bosne i Hercegovine
Parlament Federacije BiH
Dom naroda Parlamenta Federacije BiH
n/r Predsjedavajući g. Tomislav Martinović


Uputiti:

Vlada Federacije Bosne i Hercegovine
Federalno ministarstvo kulture i sporta
Federalno ministarstvo obrazovanja i nauke

Na osnovu člana 155. stav (2), a u vezi sa članovima 156. i 157. Poslovnika Doma naroda Parlamenta Federacije Bosne i Hercegovine („Službene novine Federacije BiH“, broj 2/03, 21/09 i 24/20), kao ovlaštena predlagačica, dostavljam **NACRT O PRIVREMENOM PREUZIMANJU UPRAVLJANJA I FINANSIRANJA INSTITUCIJA KULTURE I OBRAZOVANJA ČIJI JE OSNIVAČ BOSNA I HERCEGOVINA**, radi razmatranja i prihvatanja u Parlamentu Federacije Bosne i Hercegovine.

DELEGATKINJA

Miomirka Melank



Miomirka Melank

Delegatkinja u Domu naroda Parlamenta FBiH

NACRT

**ZAKON O PRIVREMENOM PREUZIMANJU UPRAVLJANJA I FINANSIRANJA
INSTITUCIJA KULTURE I OBRAZOVANJA ČIJI JE OSNIVAČ BOSNA I
HERCEGOVINA**

Sarajevo, august 2024. godine

ZAKON
O PRIVREMENOM PREUZIMANJU UPRAVLJANJA I FINANSIRANJA INSTITUCIJA
KULTURE I OBRAZOVANJA ČIJI JE OSNIVAČ BOSNA I HERCEGOVINA

I. OPĆE ODREDBE

Član 1.

(Predmet Zakona)

Ovim zakonom se uređuje privremeno preuzimanje upravljanja i finansiranja institucija kulture i obrazovanja čiji je osnivač Bosna i Hercegovina a čije osnivanje i upravljanje nije uređeno Aneksom VII. Dejtonskog mirovnog sporazuma niti drugim posebnim zakonima, a koje se finansiraju iz sredstava budžeta Ministarstva civilnih poslova Bosne i Hercegovine, Federacije Bosne i Hercegovine, Kantona Sarajevo i lokalnih samouprava sa područja Kantona Sarajevo.

Član 2.

(Zabrana diskriminacije)

Izrazi koji se koriste u ovom zakonu a imaju rodno značenje odnose se jednako na muški i ženski rod.

Član 3.

(Definicije pojmova)

U smislu ovog zakona, institucije kulture i obrazovanja čiji osnivač je Bosna i Hercegovina (u daljnjem tekstu: institucije kulture i obrazovanja) su javne institucije kulture i obrazovanja osnovane od bivše Socijalističke Republike Bosne i Hercegovine (u daljnjem tekstu: bivša SRBiH) koje obavljaju kulturne djelatnosti kojom se ostvaruje pravo građana, odnosno zadovoljavanje potreba građana kao i ostvarivanje drugog interesa u oblasti kulture u skladu sa ovim zakonom.

Član 4.

(Institucije kulture i obrazovanja)

(1) Ovaj zakon će se privremeno primjenjivati isključivo na sljedeće institucije kulture i obrazovanja:

- a) Zemaljski muzej Bosne i Hercegovine;
- b) Nacionalna i univerzitetska biblioteka Bosne i Hercegovine;
- c) Historijski muzej Bosne i Hercegovine;
- d) Umjetnička galerija Bosne i Hercegovine;
- e) Kinoteka Bosne i Hercegovine;
- f) Biblioteka za slijepa i slabovidna lica Bosne i Hercegovine;
- g) Muzej pozorišne umjetnosti i književnosti Bosne i Hercegovine.

- (2) Ovaj zakon će se privremeno primjenjivati na institucije kulture i obrazovanja iz stava (1) ovog člana sve do trenutka kada Bosna i Hercegovina, kao osnivač institucija kulture i obrazovanja iz stava (1) ovog člana, počne ispunjavati prava i obaveze osnivača nad institucijama kulture i obrazovanja iz stava (1) ovog člana.

Član 5.

(Javni interes Federacije Bosne i Hercegovine za privremenim upravljanjem i finansiranjem)

Ovim zakonom utvrđuje se postojanje javnog interesa Federacije Bosne i Hercegovine za privremenim upravljanjem i finansiranjem institucija kulture i obrazovanja iz člana 4. ovog zakona i to:

- a) pravo građana Federacije Bosne i Hercegovine na pristup uslugama institucija kulture i obrazovanja u okviru njihovih registriranih djelatnosti;
- b) prava i obaveze institucija kulture i obrazovanja da obavljaju poslove iz okvira njihove registrirane djelatnosti koje su od općeg i javnog društvenog interesa uređene posebnim zakonima iz oblasti kulture;
- c) prava zaposlenika na rad i dohodak za obavljanje rada i poslova iz registrirane djelatnosti ovih institucija kulture i obrazovanja;
- d) zaštita objekata u kojima su smještene ove institucije kulture i obrazovanja od daljnjeg propadanja, a posebno onih koji su na listi proglašanih nacionalnih spomenika.

Član 6.

(Principi)

Principi privremenog preuzimanja upravljanja i finansiranja institucija kulture i obrazovanja čiji je osnivač Bosna i Hercegovina su:

- a) zakonitost – prava i obaveze institucija da obavljaju poslove u okviru registrirane djelatnosti na način kako je to propisano zakonom;
- b) odgovornost – podrazumijeva odgovornost Federacije Bosne i Hercegovine za održivost institucija kulture i obrazovanja iz člana 4. stav (1) ovog zakona, ali i prema građanima kako bi imali nesmetan pristup institucijama kulture i obrazovanja, te prema korištenju javnih sredstava;
- c) javnost i transparentnost organa Federacije Bosne i Hercegovine u procesu održivosti rada institucija kulture i obrazovanja, finansiranja, monitoringa i izvještavanja o utrošku budžetskih sredstava.

Član 7.

(Obaveze institucija kulture i obrazovanja)

Obaveze institucija kulture i obrazovanja su da svojim radom doprinese: očuvanju, istraživanju, proučavanju, predstavljanju, prikupljanju i podsticanju domaćeg kulturnog i umjetničkog nasljeđa, kao i savremenog, domaćeg, kulturnog i umjetničkog stvaralaštva.

Član 8.

(Digitalizacija)

- (1) U obavljanju svojih poslova institucije kulture i obrazovanja obavezne su koristiti jedinstvena softverska rješenja, te omogućiti dostupnost i razmjenu podataka i informacija u skladu sa Zakonom o slobodi pristupa informacijama u Federaciji Bosne i Hercegovine („Službene novine FBiH“, br. 32/01 i 48/11).
- (2) Digitalizacija kulturnog nasljeđa je sastavni dio rada institucija kulture i obrazovanja.
- (3) Bliži uvjeti, procesi, standardi i zadaci u oblasti digitalizacije kulturnog nasljeđa i savremenog stvaralaštva i primjene jedinstvenih informacionih sistema uređuju se aktom Vlade Federacije Bosne i Hercegovine (u daljnjem tekstu: Vlada FBiH).

II. PRIVREMENA OSNIVAČKA PRAVA

Član 9.

(Privremena osnivačka prava i način finansiranja)

- (1) Vlada FBiH, odnosno Federalno ministarstvo kulture i sporta i Federalno ministarstvo obrazovanja i nauke (u daljnjem tekstu: ministarstva) na privremenoj bazi preuzimaju u cjelini finansiranje rada i programa institucija kulture i obrazovanja čiji osnivač je bivša SRBiH, te vršenje privremenih osnivačkih prava u pogledu imenovanja direktora, članova upravnog i nadzornog odbora institucija kulture i obrazovanja.
- (2) Vlada FBiH će putem Federalnog ministarstva obrazovanja i nauke finansirati rad Zemaljskog muzeja Bosne i Hercegovine i Nacionalne i univerzitetske biblioteke Bosne i Hercegovine.
- (3) Vlada FBiH će putem Federalnog ministarstva kulture i sporta finansirati institucije kulture i obrazovanja iz člana 4. stav (1) tačke od c) do g) ovog zakona.
- (4) Institucije kulture i obrazovanja iz člana 4. stav (1) ovog zakona neće mijenjati svoj zatečeni status niti registraciju dok se na njih primjenjuje ovaj zakon.

Član 10.

(Privremena saglasnost na akte)

Na statut i na akt o organizaciji i sistematizaciji poslova institucije kulture i obrazovanja privremenu saglasnost daje Vlada FBiH.

Član 11.

(Statut)

Statut je osnovni opći akt institucije kulture i obrazovanja kojim se uređuje:

- a) djelatnost institucije kulture i obrazovanja;
- b) unutrašnja organizacija institucije kulture i obrazovanja;
- c) organi institucije kulture i obrazovanja, njihov sastav, način imenovanja i nadležnosti;
- d) uvjeti za imenovanje i razrješenje direktora institucije kulture i obrazovanja;
- e) odgovornost institucije kulture i obrazovanja za obaveze u pravnom prometu;
- f) druga pitanja značajna za rad institucije kulture i obrazovanja.

III. ORGANI INSTITUCIJE KULTURE I OBRAZOVANJA

Član 12.

(Organi institucije kulture i obrazovanja)

- (1) Organi institucije kulture i obrazovanja su: upravni odbor, direktor i nadzorni odbor.
- (2) Organ upravljanja u instituciji kulture i obrazovanja je upravni odbor.
- (3) Organ rukovođenja (poslovni organ) u instituciji kulture i obrazovanja je direktor institucije kulture i obrazovanja.
- (4) Organ kontrole poslovanja u instituciji kulture i obrazovanja je nadzorni odbor.
- (5) Institucija kulture i obrazovanja može imati umjetničkog, programskog ili stručnog direktora i umjetnički, programski ili stručni savjet, u skladu sa ovim zakonom i statutom institucije kulture i obrazovanja.

Član 13.

(Upravni odbor)

- (1) Institucijom kulture i obrazovanja upravlja upravni odbor.
- (2) Upravni odbor institucije kulture i obrazovanja ima pet članova.

Član 14.

(Imenovanje upravnog odbora)

- (1) Članovi upravnog odbora institucije kulture i obrazovanja imenuju se na period četiri godine i mogu biti imenovani najviše dva puta.
- (2) Predsjednika i članove upravnog odbora imenuje i razrješava Vlada FBiH.
- (3) Predsjednik i tri člana upravnog odbora imenuju se iz reda istaknutih kulturnih i javnih ličnosti, a jedan član bira se iz reda stručnih radnika zaposlenih u instituciji kulture i obrazovanja.

- (4) Sastav upravnog odbora treba osigurati zastupljenost najmanje 40% predstavnika manje zastupljenog spola.
- (5) U slučaju spriječenosti predsjednika upravnog odbora sjednicu upravnog odbora može zakazati i njom predsjedavati najstariji član upravnog odbora.
- (6) Predsjedniku i članovima upravnog odbora može pripadati naknada za rad, pod uvjetima i prema mjerilima utvrđenim posebnim aktom Vlade FBiH.

Član 15.

(Vršitelj dužnosti predsjednika i člana upravnog odbora)

- (1) Vlada FBiH može, do imenovanja predsjednika i članova upravnog odbora institucije kulture i obrazovanja, imenovati vršitelja dužnosti predsjednika i članova upravnog odbora.
- (2) Vlada FBiH može imenovati vršitelja dužnosti predsjednika i člana upravnog odbora institucije kulture i obrazovanja i u slučaju kada predsjedniku, odnosno članu upravnog odbora prestane dužnost prije isteka mandata.
- (3) Vršitelj dužnosti predsjednika, odnosno člana upravnog odbora može obavljati tu funkciju najduže jednu godinu.
- (4) Isto lice ne može biti dva puta uzastopno imenovano za vršitelja dužnosti predsjednika, odnosno člana upravnog odbora iz stava (1) ovog člana.

Član 16.

(Nadležnosti upravnog odbora)

Upravni odbor institucije kulture i obrazovanja:

- a) donosi statut institucije kulture i obrazovanja, uz prethodnu saglasnost Vlade FBiH;
- b) donosi druge opće akte institucije kulture i obrazovanja, predviđene zakonom i statutom;
- c) utvrđuje planove rada i razvoja, uz prethodnu saglasnost Vlade FBiH;
- d) odlučuje o poslovanju institucije kulture i obrazovanja;
- e) donosi plan i program rada institucije kulture i obrazovanja na prijedlog direktora;
- f) donosi godišnji finansijski plan;
- g) usvaja godišnji obračun;
- h) utvrđuje godišnji program rada, uz prethodnu saglasnost Vlade FBiH;
- i) usvaja godišnji izveštaj o radu i poslovanju;
- j) daje prijedlog o statusnim promjenama u skladu sa zakonom;
- k) imenuje i razrješava direktora institucije kulture i obrazovanja, uz prethodnu saglasnost Vlade FBiH;
- l) usmjerava, kontroliše i ocjenjuje rad direktora institucije kulture i obrazovanja;
- m) rješava sva pitanja odnosa sa Vladom FBiH;
- n) odlučuje o korištenju sredstava od 10.000,00KM i više;
- o) odgovara Vladi FBiH za rezultate rada institucije kulture i obrazovanja;

- p) odlučuje o svim pitanjima obavljanja djelatnosti radi kojih je institucija kulture i obrazovanja osnovana, ako ovim zakonom nije drugačije regulisano;
- q) odlučuje o drugim pitanjima utvrđenim zakonom i statutom.

Član 17.

(Razrješenje članova upravnog odbora)

- (1) Dužnost člana upravnog odbora institucije kulture i obrazovanja prestaje istekom mandata i razrješenjem.
- (2) Vlada FBiH razriješit će člana upravnog odbora prije isteka mandata:
 - a) na lični zahtjev;
 - b) ako utvrdi da je odgovoran za neuspješan ili nezakonit rad institucije kulture i obrazovanja;
 - c) ako je institucija kulture i obrazovanja poslovala sa gubitkom uzastopno dvije godine;
 - d) ako je protiv njega pokrenut krivični postupak za djelo koje ga čini nedostojnim za obavljanje dužnosti člana upravnog odbora, odnosno ako je pravomoćnom sudskom odlukom osuđen za krivično delo koje ga čini nedostojnim za obavljanje dužnosti člana upravnog odbora institucije kulture i obrazovanja;
 - e) iz drugih razloga utvrđenih zakonom ili statutom institucije kulture i obrazovanja.
- (3) U slučaju da dođe do prijevremenog razrješenja predsjednika i člana upravnog odbora, Vlada FBiH će istovremeno imenovati vršitelje dužnosti predsjednika i člana upravnog odbora na period od najviše tri mjeseca dok se ne provede zakonom propisana procedura konačnog imenovanja.
- (4) Proceduru razrješenja predsjednika i člana upravnog odbora prije isteka mandata na koji su imenovani provodi Vlada FBiH u skladu sa Zakonom o ustanovama („Službeni list R BiH“, br.: 6/92, 8/93 i 13/94) i ovim zakonom.

Član 18.

(Direktor)

- (1) Institucijom kulture i obrazovanja rukovodi poslovodni organ – direktor institucije kulture i obrazovanja.
- (2) Direktora institucije kulture i obrazovanja, čiji je osnivač bivša SRBiH, imenuje i razriješava upravni odbor institucije kulture i obrazovanja na osnovu javnog konkursa, uz prethodnu saglasnost Vlade FBiH a na prijedlog nadležnog ministarstva.

Član 19.

(Imenovanje direktora)

- (1) Direktor institucije kulture i obrazovanja, čiji je osnivač bivša SRBiH, imenuje se na osnovu prethodno provedenog javnog konkursa na period četiri godine i može biti imenovan najviše dva mandata.

- (2) Javni konkurs iz stava (1) ovog člana raspisuje i provodi upravni odbor institucije kulture i obrazovanja, uz prethodnu saglasnost nadležnog ministarstva.
- (3) Javni konkurs iz stava (1) ovog člana raspisuje se najkasnije 60 dana prije isteka mandata direktora.
- (4) Javni konkurs iz stava (1) ovog člana objavljuje se na web stranici Federalnog zavoda za zapošljavanje, na oglasnoj tabli i u najmanje jednim dnevnim novinama koje se distribuiraju na cijeloj teritoriji BiH.
- (5) Rok za podnošenje prijave na javni konkurs ne može biti kraći od osam ni duži od 15 dana od dana oglašavanja javnog konkursa.
- (6) Upravni odbor je dužan postupati sa prijavama na javni konkurs u skladu sa zakonom kojim se uređuje upravni postupak.
- (7) Upravni odbor institucije kulture i obrazovanja obavlja razgovor sa kandidatima koji ispunjavaju uvjete iz konkursa i u roku 30 dana od dana završetka javnog konkursa dostavlja nadležnom ministarstvu obrazloženi prijedlog liste kandidata.
- (8) Lista kandidata sadrži mišljenje upravnog odbora o stručnim i organizacionim sposobnostima svakog kandidata i zapisnik o obavljenom razgovoru.
- (9) Nadležno ministarstvo predlaže Vladi FBiH prvorangiranog kandidata sa liste kandidata za poziciju direktora.
- (10) Ako nadležno ministarstvo ne prihvati prijedloge sa liste kandidata dužno je o razlozima za to obavijestiti Vladu FBiH.
- (11) Javni konkurs nije uspio ako upravni odbor utvrdi da nema kandidata koji ispunjavaju uvjete da uđu u izborni postupak o čemu je dužan obavijestiti nadležno ministarstvo, te ako Vlada FBiH ne imenuje direktora institucije kulture i obrazovanja sa liste kandidata, odnosno ako nadležno ministarstvo ne predloži nijednog kandidata sa liste kandidata.
- (12) Ako upravni odbor ne raspiše javni konkurs u roku koji je utvrđen u stavu (3) ovog člana, obavezan je o razlozima zbog kojih javni konkurs nije raspisan obavijestiti nadležno ministarstvo.

Član 20.

(Uvjeti za kandidate na poziciji direktora)

- (1) Kandidati za poziciju direktora institucije kulture i obrazovanja moraju imati visoko obrazovanje i najmanje pet godina radnog iskustva u kulturi. Ostali uvjeti za izbor kandidata za direktora ustanove utvrđuju se statutom institucije kulture i obrazovanja.
- (2) Kandidat za poziciju direktora dužan je predložiti program rada i razvoja institucije kulture i obrazovanja kao sastavni dio konkursne dokumentacije.

Član 21.

(Vršitelj dužnosti direktora)

- (1) Ako direktor nije imenovan, upravni odbor bez konkursa imenuje vršitelja dužnosti direktora iz reda stručnih radnika zaposlenih u instituciji kulture i obrazovanja.
- (2) Vršitelj dužnosti direktora ima sva prava i dužnosti direktora.
- (3) Vršitelj dužnosti direktora rukovodi radom institucije kulture i obrazovanja do imenovanja direktora, a najduže šest mjeseci od dana njegovog imenovanja.
- (4) Isto lice ne može biti dva puta uzastopno imenovano za vršitelja dužnosti direktora iz stava (1) ovog člana.
- (5) Vlada FBiH može imenovati vršitelja dužnosti direktora institucije kulture i obrazovanja, bez prethodno provedenog javnog konkursa u slučaju kada direktoru prestane dužnost prije isteka mandata, odnosno kada javni konkurs za direktora nije uspio.
- (6) Vršitelj dužnosti direktora mora ispunjavati uvjete za izbor kandidata za direktora iz člana 20. stav (1) ovog zakona.

Član 22.

(Nadležnosti direktora)

Direktor institucije kulture i obrazovanja:

- a) zastupa i predstavlja instituciju kulture i obrazovanja trećim licima;
- b) organizira i rukovodi radom institucije kulture i obrazovanja;
- c) odgovoran je za zakonitost rada institucije kulture i obrazovanja;
- d) odgovoran je za provođenje programa rada institucije kulture i obrazovanja;
- e) predlaže upravnom odboru mjere za efikasno i zakonito obavljanje djelatnosti radi koje je institucija kulture osnovana, unutrašnju organizaciju i sistematizaciju poslova i osnovne planove rada i razvoja institucije kulture i obrazovanja;
- f) izvršava odluke upravnog odbora;
- g) odlučuje o pravima, obavezama i odgovornostima radnika iz radnog odnosa;
- h) nalogodavac je u izvršenju finansijskog plana, podnosi upravnom odboru izvještaj o finansijskom poslovanju;
- i) učestvuje u radu upravnog odbora bez prava glasa;
- j) imenuje i razrješava stručne i umjetničke direktore na mandat najduže šest mjeseci do okončanja javnog konkursa na spomenute pozicije;
- k) obavlja i druge poslove i ima druge dužnosti i prava utvrđena općim aktima institucije kulture i obrazovanja, u skladu sa ovim zakonom.

Član 23.

(Razrješenje direktora)

- (1) Dužnost direktora institucije kulture i obrazovanja prestaje istekom mandata i razrješenjem.
- (2) Upravni odbor institucije kulture i obrazovanja, uz prethodnu saglasnost Vlade FBiH, razrješit će direktora prije isteka mandata:
 - a) na lični zahtjev;

- b) ako utvrdi da je odgovoran za neuspješan ili nezakonit rad institucije kulture i obrazovanja;
 - c) ako je institucija kulture i obrazovanja poslovala sa gubitkom uzastopno dvije godine;
 - d) ako nestručnim, nepravilnim i nesavjesnim radom prouzrokuje veću štetu instituciji kulture i obrazovanja ili tako zanemaruje ili nesavjesno izvršava svoje obaveze da su nastale ili mogu nastati veće smetnje u radu institucije kulture i obrazovanja;
 - e) ako je protiv njega pokrenut krivični postupak za djelo koje ga čini nedostojnim za obavljanje dužnosti direktora, odnosno ako je pravomoćnom sudskom odlukom osuđen za krivično djelo koje ga čini nedostojnim za obavljanje dužnosti direktora institucije kulture i obrazovanja;
 - f) iz drugih razloga utvrđenih zakonom ili statutom institucije kulture i obrazovanja.
- (3) Prijedlog za prijevremeno razrješenje direktora iz razloga navedenih u stavu (1) tačka a) ovog člana može dati Vlada FBiH, predsjednik, odnosno član upravnog odbora ili nadzornog odbora institucije kulture i obrazovanja.
- (4) Proceduru razrješenja direktora prije isteka mandata na koji je imenovan provodi Vlada FBiH u skladu sa Zakonom o ustanovama („Službeni list R BiH“, br.: 6/92, 8/93 i 13/94) i ovim zakonom.

Član 24.

(Umjetnički, programski ili stručni direktor)

- (1) Institucija kulture i obrazovanja pored direktora može imati jednog umjetničkog, programskog ili stručnog direktora koji rukovodi umjetničkim, programskim ili stručnim poslovima i za njih je odgovoran.
- (2) Način i uvjeti za izbor, kao i postupak za razrješenje umjetničkog, programskog ili stručnog direktora uređuju se statutom institucije kulture i obrazovanja, u skladu sa ovim zakonom.

Član 25.

(Nadzorni odbor)

- (1) U instituciji kulture i obrazovanja obrazuje se nadzorni odbor.
- (2) Nadzorni odbor vrši nadzor nad poslovanjem institucije kulture i obrazovanja.
- (3) Nadzorni odbor ima tri člana.
- (4) Predsjednika i članove nadzornog odbora imenuje i razrješava Vlada FBiH.

Član 26.

(Imenovanje nadzornog odbora)

- (1) Članovi nadzornog odbora institucije kulture i obrazovanja iz stava (1) ovog člana imenuju se na četiri godine i mogu biti imenovani najviše dva puta.
- (2) Predsjednika i članove nadzornog odbora imenuje i razrješava Vlada FBiH.

- (3) Jedan član nadzornog odbora imenuje se iz reda stručnih radnika zaposlenih u instituciji kulture i obrazovanja.
- (4) Sastav nadzornog odbora treba osigurati zastupljenost od najmanje 30% predstavnika manje zastupljenog spola.
- (5) U slučaju spriječenosti predsjednika nadzornog odbora, sjednicu nadzornog odbora može zakazati i njom predsjedavati najstariji član nadzornog odbora.
- (6) Predsjedniku i članovima nadzornog odbora može pripadati naknada za rad, pod uvjetima i prema mjerilima utvrđenim posebnim aktom Vlade FBiH.
- (7) Za predsjednika i članove nadzornog odbora institucije kulture i obrazovanja ne mogu biti imenovani direktor, predsjednik i članovi upravnog odbora, pomoćnik direktora i umjetnički, programski ili stručni direktor.

Član 27.

(Djelokrug rada)

Nadzorni odbor:

- a) analizira izvještaje o poslovanju institucije kulture i obrazovanja;
- b) u vršenju nadzora nad upotrebom sredstava za rad, pregleda godišnje izvještaje o poslovanju i godišnji obračun;
- c) pregleda i provjerava urednost i zakonitost poslovnih knjiga;
- d) izvještava Vladu FBiH, upravni odbor i direktora institucije kulture i obrazovanja o rezultatima nadzora.

Član 28.

(Prava i dužnosti nadzornog odbora)

- (1) U ostvarivanju svojih funkcija nadzorni odbor ima prava i dužnosti:
 - a) uvida u dokumentaciju vezanu uz poslovanje institucije kulture i obrazovanja, finansijske i računovodstvene isprave, poslovne knjige, kao i druge podatke koji su u vezi sa radom službi koje obavljaju finansijsko-računovodstvene poslove institucije kulture i obrazovanja;
 - b) zahtijeva putem odgovarajućih službi u instituciji kulture i obrazovanja pružanje pomoći na istraživanju pojedinog slučaja i dostavljanju podataka kojima raspolažu;
 - c) uz prethodnu saglasnost Vlade FBiH obraća se odgovarajućim organizacijama društvene kontrole i inspekcijским službama radi pružanja stručne i druge odgovarajuće pomoći u vezi sa pitanima koja su u nadležnost nadzornog odbora;
 - d) o svom radu redovno obavještava Vladu FBiH.
- (2) Izvještaj nadzornog odbora o ustanovljenim nedostacima ili nepravilnostima treba da sadrži tačne podatke o nedostacima i nepravilnostima, podatke o nastaloj šteti i o uzrocima, prijedlog mjera za sprečavanje, odnosno otklanjanje štetnih posljedica, prijedloge za poduzimanje mjera protiv odgovarajućih lica i organa institucije kulture i obrazovanja i druge potrebne prijedloge.

- (3) Izvještaj, prijedloge i druga pisana akta koja podnosi nadzorni odbor institucije kulture i obrazovanja potpisuje predsjednik i svi članovi odbora.

Član 29.

(Vršitelj dužnosti predsjednika i člana nadzornog odbora)

- (1) Vlada FBiH može do imenovanja predsjednika i članova nadzornog odbora institucije kulture i obrazovanja imenovati vršitelje dužnosti predsjednika i članove nadzornog odbora.
- (2) Vlada FBiH može imenovati vršitelja dužnosti predsjednika i člana nadzornog odbora institucije kulture i obrazovanja i u slučaju kada predsjedniku, odnosno članu nadzornog odbora prestane dužnost prije isteka mandata.
- (3) Vršitelj dužnosti predsjednika, odnosno člana nadzornog odbora može obavljati tu funkciju najduže jednu godinu.
- (4) Isto lice ne može biti dva puta uzastopno imenovano za vršitelja dužnosti predsjednika, odnosno člana upravnog odbora iz stava (1) ovog člana.

Član 30.

(Imenovanje i razrješenje nadzornog odbora)

- (1) Dužnost člana nadzornog odbora institucije kulture i obrazovanja prestaje istekom mandata i razrješenjem.
- (2) Vlada FBiH razrješit će člana nadzornog odbora prije isteka mandata:
- a) na lični zahtjev;
 - b) ako utvrdi da je odgovoran za neuspješan ili nezakonit rad institucije kulture i obrazovanja;
 - c) ako je institucija kulture i obrazovanja poslovala sa gubitkom uzastopno dvije godine;
 - d) ako je protiv njega pokrenut krivični postupak za djelo koje ga čini nedostojnim za vršenje dužnosti člana upravnog odbora, odnosno ako je pravomoćnom sudskom odlukom osuđen za krivično delo koje ga čini nedostojnim za obavljanje dužnosti člana upravnog odbora institucije kulture i obrazovanja;
 - e) iz drugih razloga utvrđenih zakonom ili statutom institucije kulture i obrazovanja.
- (3) U slučaju da dođe do prijevremenog razrješenja predsjednika i člana nadzornog odbora Vlada FBiH će istovremeno imenovati vršitelje dužnosti predsjednika i člana nadzornog odbora na najviše tri mjeseca dok se ne provede zakonom propisana procedura konačnog imenovanja.
- (4) Proceduru razrješenja predsjednika i člana nadzornog odbora prije isteka mandata na koji su imenovani provodi Vlada FBiH u skladu sa Zakonom o ustanovama („Službeni list RBiH“, br.: 6/92, 8/93 i 13/94) i ovim zakonom.

Član 31.

(Umjetnički, programski ili stručni savjet)

- (1) U instituciji kulture i obrazovanja može se obrazovati umjetnički, programski ili stručni savjet.
- (2) Umjetnički, programski ili stručni savjet razmatra pitanja iz umjetničke, programske ili stručne djelatnosti institucije kulture i obrazovanja i direktoru, odnosno umjetničkom, programskom ili stručnom direktoru daje mišljenja i prijedloge vezane uz umjetnički, programski i stručni rad institucije kulture i obrazovanja.
- (3) U sastav umjetničkog, programskog ili stručnog savjeta biraju se lica od visokog umjetničkog i stručnog integriteta i autoriteta.
- (4) Sastav, nadležnost i način rada umjetničkog, programskog ili stručnog savjeta bliže se uređuju statutom institucije kulture i obrazovanja.

Član 32.

(Obaveza redovnog izvještavanja)

- (1) Upravni, odnosno nadzorni odbor najmanje jedanput godišnje podnosi izveštaj o svom radu nadležnom ministarstvu.
- (2) Godišnji izvještaj o radu sadrži izvještaj o:
 - a) izvršenju godišnjeg programa rada;
 - b) finansijskom poslovanju;
 - c) radu direktora;
 - d) radu upravnog odbora;
 - e) radu nadzornog odbora;
 - f) radu umjetničkog, programskog ili stručnog savjeta, ako postoji.

IV. FINANSIRANJE INSTITUCIJA KULTURE I OBRAZOVANJA

Član 33.

(Sredstva za finansiranje)

- (1) Sredstva za finansiranje javnih potreba, programa i projekata u kulturi, kao i tekući rashodi i izdaci institucija kulture i obrazovanja osiguravaju se u budžetu Vlade FBiH putem nadležnih ministarstava.
- (2) Sredstva za finansiranje javnih potreba, programa i projekata u kulturi mogu se osigurati i osnivanjem fondacija i drugih pravnih subjekata te na drugi način u skladu sa zakonima.
- (3) Ministarstvo u dogovoru sa institucijama kulture i obrazovanja, na osnovu prijedloga godišnjeg programa rada i prijedloga finansijskog plana za narednu godinu i projekcijama za naredne dvije godine, odlučuje o visini ukupnih sredstava za finansiranje rada institucija kulture i obrazovanja pri čemu Vlada FBiH dodjelom sredstava osigurava ravnomjeran kulturni razvoj institucija kulture i obrazovanja.

- (4) Prijedlog godišnjeg programa rada institucija kulture i obrazovanja sadrži posebno iskazana sredstva potrebna za finansiranje javnih potreba, programa i projekata u kulturi, kao i sredstva potrebna za finansiranje tekućih rashoda i izdataka.
- (5) Institucije kulture i obrazovanja podnose nadležnim ministarstvima prijedlog godišnjeg programa rada i prijedlog finansijskog plana za narednu godinu i projekcijama za naredne dvije godine, najkasnije do 30. juna tekuće godine.

Član 34.

(Sredstva za rad institucija kulture i obrazovanja)

- (1) Sredstva za rad institucija kulture i obrazovanja koja osigurava Vlada FBiH putem nadležnih ministarstava uključuju sredstva za plaće; sredstva za nabavku građe; sredstva za programe i projekte; materijalne izdatke; stalno stručno usavršavanje radnika; sredstva za zaštitu građe, kao i sredstva za investicije i investicijsko održavanje, ako posebnim zakonima nije drugačije određeno.
- (2) Visinu sredstava za rad institucija kulture i obrazovanja utvrđuje Vlada FBiH u dogovoru sa institucijom kulture i obrazovanja na osnovu programa rada i razvoja i finansijskog plana institucije kulture i obrazovanja, u skladu sa stavom (1) ovog člana.
- (3) Sredstva za rad institucije kulture i obrazovanja mogu se osigurati i iz vlastitih prihoda, donacijama, sponzorstvima, darovanjima i na drugi način u skladu sa zakonima.
- (4) Vlastiti prihodi institucija kulture i obrazovanja mogu se koristiti isključivo za razvoj djelatnosti institucije kulture i obrazovanja koja ih je ostvarila, što uključuje i ulaganje u programe i aktivnosti te rad radnika u skladu sa pravilnikom kojim institucija kulture i obrazovanja uređuje mjerila i način korištenja vlastitih prihoda.
- (5) Institucija kulture i obrazovanja dobijenim sredstvima raspolaze u skladu sa ovim zakonom i statutu institucije kulture i obrazovanja.

Član 35.

(Sredstva za javne potrebe u kulturi)

- (1) Javne potrebe u kulturi za koje se sredstva osiguravaju u budžetu Vlade FBiH putem nadležnih ministarstava odnose se na institucije kulture i obrazovanja u sljedećim djelatnostima i područjima:
 - a) kulturne djelatnosti:
 - 1) arhivska djelatnost;
 - 2) muzejska djelatnost;
 - 3) bibliotekarska djelatnost;
 - 4) književna djelatnost;
 - 5) audiovizuelna djelatnost;
 - b) kulturno-umjetničko stvaralaštvo:
 - 1) dramska i plesna umjetnost;
 - 2) muzička i muzičko-scenska umjetnost;

- 3) književnost;
 - 4) vizuelne umjetnosti, dizajn i arhitektura;
 - 5) interdisciplinarne i nove umjetničke i kulturne prakse;
 - 6) digitalna umjetnost;
 - 7) kulturno-umjetnički amaterizam;
- c) djelatnost zaštite, očuvanja i održivog upravljanja kulturnom baštinom;
- d) transverzalna područja:
- 1) međunarodna kulturna saradnja i mobilnost;
 - 2) dostupnost, pristup i sudjelovanje u kulturi;
 - 3) raznolikost kulturnih izražaja;
 - 4) poduzetništvo u kulturnim i kreativnim industrijama;
 - 5) digitalizacija u području kulture.
- (2) Javne potrebe u kulturi za koje se sredstva osiguravaju u budžetu Vlade FBiH putem ministarstava odnose se i na osiguravanje prostornih i drugih resursa institucijama kulture i obrazovanja u području kulture te za izgradnju, rekonstrukciju, adaptaciju, opremanje i dodjelu tih prostora.
- (3) Javne potrebe u kulturi za koje se sredstva osiguravaju u budžetu Vlade FBiH putem ministarstava odnose se i na ostvarivanje drugih programa i aktivnosti u kulturi od interesa za Bosnu i Hercegovinu.

Član 36.

(Sredstva za programe i projekte institucija kulture i obrazovanja)

- (1) Programe i projekte institucija kulture i obrazovanja utvrđuju tijela institucije kulture i obrazovanja u skladu sa ovim zakonom.
- (2) Institucije kulture i obrazovanja dužne su objaviti program rada i razvoja na svojim službenim web stranicama.
- (3) Institucije kulture i obrazovanja obavezne su dostaviti nadležnom ministarstvu izvještaj o izvršenju programa rada i razvoja institucije kulture i obrazovanja te izvještaj o izvršenju finansijskog plana institucije kulture i obrazovanja u skladu sa ovim zakonom i statutom institucije kulture i obrazovanja.

Član 37.

(Izvještaj o radu institucije kulture i obrazovanja)

Institucija kulture i obrazovanja dužna je najkasnije do 31. marta tekuće godine podnijeti izvještaj o radu i izvještaj o finansijskom poslovanju za prethodnu godinu.

V. NADZOR

Član 38.

(Nadzor)

- (1) Nadzor nad primjenom ovog zakona i nadzor nad zakonitosti rada institucije kulture i obrazovanja vrše Federalno ministarstvo obrazovanja i nauke, Federalno ministarstvo kulture i sporta i Federalno ministarstvo finansija, svako u granicama svojih nadležnosti.
- (2) Nadzor nad zakonitosti rada institucije kulture i obrazovanja nadležna ministarstva mogu vršiti neposredno i putem nadležnog federalnog inspeksijskog organa.
- (3) Nadzor nad finansijskim poslovanjem institucije kulture i obrazovanja Vlada FBiH može vršiti neposredno i putem ovlaštene revizorske kuće.

Član 39.

(Autorski, izvođački ili drugi ugovori)

Umjetnički, programski ili stručni poslovi u institucijama kulture i obrazovanja mogu se obavljati i zaključivanjem autorskih, izvođačkih ili drugih ugovora između direktora institucije kulture i obrazovanja i samostalnih umjetnika ili drugih fizičkih lica.

Član 40.

(Primjena Zakona o radu)

Na prava, obaveze i odgovornosti zaposlenih u institucijama kulture i obrazovanja primjenjuje se Zakon o radu Federacije Bosne i Hercegovine, ako zakonom nije drugačije određeno.

VI. PRIJELAZNE I ZAVRŠNE ODREDBE

Član 41.

(Usklađivanje akata)

Institucije kulture i obrazovanja, čiji osnivač je bivša SRBiH, dužne su uskladiti svoju organizaciju, rad i opće akte sa odredbama ovog zakona u roku godinu dana od dana početka primjene ovog zakona.

Član 42.

(Kontinuitet rada)

Do imenovanja direktora, predsjednika i članova upravnog, odnosno nadzornog odbora institucije kulture i obrazovanja, čiji osnivač je bivša SRBiH, prema odredbama ovog zakona, direktor,

predsjednik i članovi upravnog, odnosno nadzornog odbora tih institucija kulture i obrazovanja, nastavljaju rad prema propisima koji su važili na dan njihovog imenovanja, uključujući i pravila u slučaju prestanka dužnosti.

Član 43.

(Podzakonski akti)

Podzakonski propisi za provođenje ovog zakona donijet će se u roku šest mjeseci od dana stupanja na snagu ovog zakona.

Član 44.

(Stupanje na snagu)

Ovaj zakon stupa na snagu osmog dana od dana objavljivanja u „Službenim novinama Federacije Bosne i Hercegovine“.

OBRAZLOŽENJE

I – USTAVNI OSNOV

Ustavni osnov za donošenje Zakona o privremenom preuzimanju upravljanja i finansiranja institucija kulture i obrazovanja čiji je osnivač Bosna i Hercegovina sadržan je u odredbama člana III. 1. tačka c) kojim je u isključivoj nadležnosti Federacije BiH donošenje propisa o finansijama i finansijskim institucijama Federacije i fiskalna politika Federacije BiH. Također je relevantan član III.3. stav (3) prema kome Federalna vlast ima pravo utvrđivati politiku i donositi zakone koji se tiču svake od ovih nadležnosti kada se radi o zakonima i drugim propisima koji su obavezujući na području cijele Federacije BiH, a postoji potreba za fleksibilnošću u provođenju. U konačnici tu je i član IV. A. 20. stav (1), tačka d) Ustava Federacije Bosne i Hercegovine, prema kojem je Parlament Federacije Bosne i Hercegovine, uz ostala ovlaštenja predviđena Ustavom, odgovoran za donošenje zakona o obavljanju dužnosti federalne vlasti.

II – RAZLOZI ZA DONOŠENJE ZAKONA

Problem finansiranja sedam institucija kulture i obrazovanja čiji osnivač je Bosna i Hercegovina predstavlja jedan od gorućih problema zadnje tri decenije. Stoga se razlozi za donošenje Zakona o privremenom preuzimanju upravljanja i finansiranja institucija kulture i obrazovanja čiji osnivač je Bosna i Hercegovina prvenstveno ogledaju u osiguravanju finansijske stabilnosti, kako ovih temeljnih institucija, tako i zaposlenih radnika koji trenutno sa svojim platama ovise o dodjeljenim sredstvima za projekte s raznih nivoa unutar države. Privremenim preuzimanjem upravljanja i finansiranja institucija kulture i obrazovanja čiji osnivač je Bosna i Hercegovina može se pomoći u stabilizaciji finansijskog stanja institucija koje se suočavaju sa problemima u obezbjeđivanju sredstva za tzv. hladni pogon, zbog čega nemaju stabilno funkcionisanje.

III – OBRAZLOŽENJE PREDLOŽENIH MJERA

Član 1. – Ovaj član definiše opseg Zakona, koji se odnosi na privremeno preuzimanje upravljanja i finansiranja institucija kulture i obrazovanja čiji je osnivač Bosna i Hercegovina. Zakonom se reguliše upravljanje institucijama koje nisu obuhvaćene Aneksom VII Daytonskog mirovnog sporazuma niti posebnim zakonima, a koje se finansiraju iz različitih nivoa budžeta u BiH.

Član 2. – Ovaj član osigurava da izrazi u Zakonu koji imaju rodno značenje jednako obuhvaćaju i muški i ženski rod, čime se sprječava diskriminacija na osnovu spola.

Član 3. – Ovim članom se definišu institucije kulture i obrazovanja čiji je osnivač Bosna i Hercegovina, te se naglašava da se radi o javnim institucijama koje su osnovane od strane bivše Socijalističke Republike Bosne i Hercegovine i koje se bave kulturnim djelatnostima u skladu sa Zakonom.

Član 4. – Ovaj član navodi specifične institucije koje će biti obuhvaćene privremenom primjenom Zakona. Također, precizira da će se Zakon primjenjivati sve dok Bosna i Hercegovina ne preuzme prava i obaveze osnivača nad ovim institucijama.

Član 5. – Ovaj član ističe javni interes Federacije BiH u privremenom upravljanju i finansiranju navedenih institucija, uključujući pravo građana na pristup uslugama, obaveze institucija prema zakonima iz oblasti kulture, zaštitu radnika i očuvanje objekata koji su nacionalni spomenici.

Član 6. – Član postavlja osnovna načela za privremeno preuzimanje upravljanja i finansiranja, uključujući zakonitost, odgovornost, i transparentnost u radu, finansiranju i izvještavanju o upotrebi budžetskih sredstava.

Član 7. – Ovaj član određuje obaveze institucija da doprinesu očuvanju, istraživanju i prezentaciji kulturnog i umjetničkog nasljeđa, te savremenog stvaralaštva.

Član 8. – Ovim članom se propisuje obaveza institucija da koriste jedinstvena softverska rješenja i omogućuju dostupnost podataka, kao i da digitalizacija kulturnog nasljeđa bude sastavni dio njihovog rada, pri čemu se detalji o standardima i zadacima u ovoj oblasti utvrđuju putem posebnog akta Vlade FBiH.

Član 9. – Ovaj član osigurava da Vlada FBiH i nadležna ministarstva privremeno preuzimaju finansiranje i upravljanje institucijama čiji je osnivač bivša SRBiH, te definiraju način imenovanja upravljačkih tijela ovih institucija.

Član 10. – Ovaj član propisuje da Vlada FBiH daje privremenu saglasnost na statut i akt o organizaciji i sistematizaciji poslova institucija kulture i obrazovanja.

Član 11. – Ovim članom se objašnjava funkcija statuta kao osnovnog općeg akta institucije, a kojim se uređuje djelatnost, unutrašnja organizacija, organi, uslovi za imenovanje direktora, odgovornost u pravnom prometu i druga važna pitanja za rad institucije.

Član 12. – Ovaj član definiše osnovne organe institucije kulture i obrazovanja, uključujući upravni odbor (koji upravlja), direktora (koji rukovodi) i nadzorni odbor (koji kontroliše). Takođe, predviđa mogućnost imenovanja dodatnih direktora i savjeta.

Član 13. – Ovdje se objašnjava da upravni odbor upravlja institucijom kulture i obrazovanja, i da se sastoji od 5 članova.

Član 14. – Ovaj član reguliše način imenovanja članova upravnog odbora, njihovu funkciju i mandat, kao i način na koji se predsjednik i članovi imenuju i razrješavaju. Također se postavlja obaveza za ravnoteženu zastupljenost polova.

Član 15. – Ovim članom se definiše slučaj privremene potrebe za vođenjem upravnog odbora, pri čemu Vlada FBiH može imenovati vršitelje dužnosti koji mogu obavljati te funkcije najviše godinu dana.

Član 16. – Ovim članom se detaljno navode nadležnosti upravnog odbora, uključujući donošenje statuta, finansijskih planova i imenovanje direktora.

Član 17. – Ovaj član pruža uvjete pod kojima članovi upravnog odbora mogu biti razriješeni prije isteka mandata, uključujući neuspjeh u radu i krivične prijave.

Član 18. – Ovim članom se propisuje da direktor rukovodi institucijom i kako se imenuje i razrješava direktor, uključujući javni konkurs i saglasnost Vlade FBiH.

Član 19. – Ovaj član reguliše postupak imenovanja direktora putem javnog konkursa, uključujući rokove i objavljivanje konkursa.

Član 20. – Ovaj član definiše osnovne uslove koje kandidati moraju ispunjavati, kao što su visoko obrazovanje i iskustvo u kulturi, te obavezu predlaganja programa rada.

Član 21. – Ovaj član reguliše imenovanje vršitelja dužnosti direktora u slučaju da direktor nije imenovan ili prestane s radom, te rok i uvjete za imenovanje.

Član 22. – Ovim članom su opisane nadležnosti direktora, uključujući predstavljanje institucije, rukovođenje radom i izvršavanje odluka upravnog odbora.

Član 23. – Ovaj član opisuje uvjete pod kojima direktor može biti razriješen prije isteka mandata, kao što su neuspješan rad ili krivične prijave.

Član 24. – Ovaj član definiše mogućnost imenovanja dodatnih direktora (umjetničkog, programskog ili stručnog) i pravila za njihov izbor i razrješenje.

Član 25. – Ovim članom se opisuje da institucija mora imati nadzorni odbor koji obavlja nadzor nad poslovanjem i njegov sastav.

Član 26. – Ovim članom se reguliše način imenovanja članova nadzornog odbora, uključujući mandat, sastav i uvjete za imenovanje.

Član 27. – Ovim članom se objašnjavaju osnovne funkcije nadzornog odbora, uključujući analizu izvještaja i pregled zakonitosti poslovanja.

Član 28. – Ovaj član definiše prava i dužnosti nadzornog odbora u vezi sa uvidom u dokumentaciju, pružanjem pomoći i izvještavanjem o radu.

Član 29. – Ovaj član reguliše imenovanje vršitelja dužnosti za predsjednika i članove nadzornog odbora u slučaju njihove spriječenosti ili prestanka mandata.

Član 30. – Ovim članom se opisuju uvjeti pod kojima članovi nadzornog odbora mogu biti razriješeni prije isteka mandata, kao i procedura za imenovanje vršitelja dužnosti.

Član 31. – Ovim članom se navodi mogućnost obrazovanja savjeta (umjetničkog, programskog ili stručnog) koji daje mišljenja i prijedloge vezane za rad institucije.

Član 32. – Ovaj član definiše obavezu upravnog i nadzornog odbora da godišnje podnose izvještaje o svom radu nadležnom Ministarstvu, uključujući izvještaje o programu rada, finansijskom poslovanju, i radu direktora i savjeta.

Član 33. – Ovaj član reguliše način osiguravanja sredstava za institucije kulture i obrazovanja, uključujući tekuće rashode i projekte. Sredstva se obezbjeđuju iz Budžeta Vlade FBiH putem nadležnih Ministarstava, a mogu se osigurati i osnivanjem fondacija i drugim zakonitim putem. Ministarstvo odlučuje o visini sredstava na osnovu prijedloga godišnjeg programa i finansijskog plana.

Član 34. – Ovim članom se opisuje šta sredstva za rad institucija kulture i obrazovanja obuhvataju, uključujući plaće, nabavku građe, materijalne izdatke i investicije. Takođe se definiše način utvrđivanja visine sredstava i mogućnost pribavljanja sredstava iz vlastitih prihoda i donacija.

Član 35. – Ovaj član definiše oblasti i djelatnosti za koje se sredstva osiguravaju iz Budžeta Vlade FBiH, uključujući kulturne djelatnosti, kulturno-umjetničko stvaralaštvo, zaštitu kulturne baštine, i druge transverzalne oblasti kao što su međunarodna saradnja i digitalizacija u kulturi.

Član 36. – Ovim članom se navodi da institucije kulture i obrazovanja određuju programe i projekte u skladu sa Zakonom i obavezuju se da objave svoj program rada i dostave izvještaje o izvršenju programa i finansijskog plana.

Član 37. – Ovaj član propisuje obavezu institucija kulture i obrazovanja da do 31. marta tekuće godine dostave izvještaj o radu i finansijskom poslovanju za prethodnu godinu.

Član 38. – Ovaj član definiše organe koji vrše nadzor nad primjenom Zakona i zakonitošću rada institucija kulture i obrazovanja, uključujući Federalno ministarstvo obrazovanja i nauke, Federalno ministarstvo kulture i sporta, i Federalno ministarstvo finansija, te mogućnost nadzora putem inspekcijskih organa i revizorskih kuća.

Član 39. – Ovim članom se navodi da umjetnički, programski ili stručni poslovi u institucijama kulture i obrazovanja mogu biti regulisani putem autorskih i drugih ugovora između direktora institucije i samostalnih umjetnika ili drugih fizičkih lica.

Član 40. – Ovaj član navodi da se na prava i obaveze zaposlenih u institucijama kulture i obrazovanja primjenjuje Zakon o radu FBiH, osim ako je zakonom drugačije određeno.

Član 41. – Ovim članom se predviđa da institucije kulture i obrazovanja čiji je osnivač bivša SRBiH moraju uskladiti svoju organizaciju, rad i akte sa odredbama ovog Zakona u roku od godinu dana od početka primjene Zakona.

Član 42. – Ovim članom se predviđa da postojeći rukovodioci nastavljaju rad prema prethodnim propisima i pravilima za slučaj prestanka dužnosti do imenovanja novih direktora, predsjednika i članova odbora.

Član 43. – Ovaj član propisuje da će podzakonski propisi za sprovođenje Zakona biti doneseni u roku od šest meseci od stupanja na snagu Zakona.

Član 44. – Ovim članom se propisuje stupanje na snagu Zakona.

IV – POTREBNA FINANSIJSKA SREDSTVA ZA PROVOĐENJE ZAKONA

Za provođenje **Zakona o privremenom preuzimanju upravljanja i finansiranja institucija kulture i obrazovanja čiji je osnivač Bosna i Hercegovina** potrebno je izdvojiti dodatna sredstva u Budžetu Federacije Bosne i Hercegovine, i to u Ministarstvu kulture i sporta i Ministarstvu nauke i obrazovanja.